

## Inatsisissatut siunnersuummut nassuiaatit

### **Nalinginnaasumik nassuiaatit**

#### **1. Aallaqqaasiut**

Inatsisissatut siunnersuutip saqqummiunneqartup, Naalakkersuisut kissaateqarneratigut saqqummiunneqartup, aningaasarsiaqartitsineranut malittarisassat atuuttut aamma Inatsisartunut ilaasortaaneranut Naalakkersuisunullu ilaasortaaneranut atatillugu atugassarititaasut allat akornanni ataqatigiinnerulersitsinissaq siunertaraa.

#### **2. Siunnersuummi immikkoortut pingaarnerit**

Aningaasarsiaqartitaaneq pillugu inatsisip allanngortinneqarnerata 2003-mi akuerineqarneratigut ilaatigut inatsimmi tunngavissiisoqarpoq Inatsisartunut ilaasortat Nuummi inissaqartinneqarsinnaasut inissiat immikkut immikkoortitat aqutugalugit. Tamatumuuna ilaatigut siunertarinqarpoq Inatsisartut ataatsimiinnerinut atatillugu angalaneranut, najugaqarneranut ullormusianullu nunatta karsiata aningaasartuutigisartagaasa annikillisinneqarnissaat. Inatsisartunut ilaasortat ineqarnerminnut akiliutigisartagaasaat nalinginnaasumik inissianik attartortarneq pillugu peqqussummi ineqarnermut akiliutip naatsorsorneqartarnissaa nalinginnaasumik atuuttoq naapertorlugu naatsorsorneqartassasoq, tassa tamatumani attartornermut akiliutit qaffanneqartarnerat ilanngullugu, aalajangersarneqarpoq.

Inatsisartunut ilaasortatut pinnatik Inatsisartut siulittaasuat aamma Naalakkersuisut siulittaasuat ineqarnermut akiliuteqartinneqartarsimapput ineqartinneqarnerup akileraartarnikkut nalilerneqarnera tunngavigalugu Naalakkersuisunullu ilaasortat ineqarnermut akiliuteqartarsimallutik atorfimmut atatillugu inissiat najugaqarfigissallugit pisussaaffittallit pillugit malittarisassat malillugit naatsorsorneqartartumik. Akileraartarnikkut naliliussaasartoq aamma atorfimmut atatillugu inissianut najugaqarfigissallugit pisussaaffittalinnut ineqarnermut akiliut ukiorpassuarni kingullerni iluarsineqarsimangillat. Inatsisissatut siunnersuutikkut siunniunneqarpoq siulittaasut ineqarnermut akiliutigisartagaat siunissami aalajangersimasumik ataavartumillu iluarsineqartalissasoq. Siunnersuummi siulittaasup Naalakkersuisunulluunniit ilaasortap Nuup avataani inissiamut allamut aningaasartuuteqarsinnaanera, taamatullu aamma inigisamut atatillugu sinniisutut pisussaaffeqarsinnaanerup ippinnartorisinnaasaasa matussuserneqarnissaat, isiginiarneqarsimapput.

Inatsisartunut ilaasortat Nuummi najugaqalerniarlutik aalajangersimasut eqqarsaatigalugit Nuummut Nuummiillu nuunnermut atatillugu aningaasartuutit malittarisassat Kalaallit Nunaanni tjenestemandinut qaqugukkulluunniit atuuttut malillugit matussuserneqartartussaapput, tassalu aamma ilaatigut aatsaat ukiut pingasut najugaqartoqareeraangat angerlarnermut aningaasartuutit akilerneqarsinnaallutik. Angerlarnermullu aningaasartuutit aamma matussuserneqartartussaapput piffissap sivikinnerusup iluani ilaasortap qinigaaffini annaassagaluarpagu. Taamatut aningaasartuutit matussuserinneqarsinnaanerit siunnersuutigineqarpoq Naalackersuisunut ilaasortanut aamma atuutilissaaq, taakku atorfimmini atuuffiata piffissaq qinigaaffik malinnagu naalackersuinikkut aalajangiineq malittarmagu, taamaattumillu siunnersuutigineqarluni taakku nuummerminnut aningaasartuutaat aamma matussuserneqarsinnaassasut piffissami aalajangersimasumi naalackersuisuni atuuffeqarsimaneq apeqputaatinnagu.

Naalackersuisunut ilaasortat Inatsisartunut ilaasortatut pinnatik napparsimanermi, qanigisat napparsimanerini toqukkulluunniit qimagunnerini, naartunermi, meerartaarnermi qitornavissiarthaarnermiluunniit aningaasarsiaqarsinnaamerminnut inatsimmi tunngavissinneqarsimanngillat. Ilaasortat akornanni atugassarititaasut assigiinnerulerseqqullugit siunnersuutikkut tamatumunnga tunngavissiisoqarnissaa siunnersuutigineqarpoq.

Angalanernut atatillugu malittarisassani atuuttuni angalanerini aningaasartuutaanerusut tamatigut akiligassiissut malillugu matussuserneqartartussaapput. Malittarisassaq tamanna pisut ilaanni pissusissamisuunngitsutut allaffissornikkullu pisariusutut misiginartarpoq, ilaatigut taamatut immi matussuseeriaaseq pissutigalugu, ilaatigullu taamatut aaqqissuussineq Naalackersuisunut ilaasortap angalanermini aningaasartuutigisinnaasaanik tamanik matussusiineq ajormat.

Taamaattumik siunnersuutigineqarpoq Naalackersuisunut ilaasortat toqqarsinnaassagaat angalanernut atatillugu aningaasartuutit massakkutut akiligassaq malillugu matussuserinneqartarniarnerlugit imaluunniit nalinginnaasumik ullormusiaqartinneqarniarnerlutik malittarisassat qaqugukkulluunniit tjenestemandinut Namminersorlutik Oqartussani atorfilinnut atuuttut malillugit. Aaqqissuussinerup allaffissornikkut aqunneqarnera eqqarsaatigalugu siunnersuutigineqarpoq Naalackersuisut ukiumut ataatsimut atuuttussamik aaqqissuussinermik sorlermik atuiarnerlutik siumut toqqaasinnaalissasut.

Aningaasarsiaqartitaaneq pillugu inatsimmi sinniisussat Inatsisartunut ilaasortaajutigisut, taamatullu aamma Inatsisartunut siulittaasup Naalackersuisunut ilaasortannortup, ilaasortaajunnaarsiuteqarsinnaanerannik killisiisoqarsimavoq. Siunnersuutigineqarpoq taamatut marloqiusamik ilaasortaajunnaarneriuteqarsinnaanermik killiliineq aamma

atuutsinneqalissasoq Naalakkersuisut siulittaasup Naalakkersuisunullu ilaasortat Inatsisartunut ilaasortaajutigisut ilaasortaajunnaarnersiutaat eqqarsaatigalugit.

Inuiaqatigiit ineriartorerisa inatsisiliornerillu malitsigisaannik qulaajaanerni, isumalioqatigiissitani il.il. imaannaannginnerusuni ineriartorerup malitsigisaasa aamma ilagisimavaat pisuni ataasiakkaani nalilerneqarmat naammanngitsoq isumalioqatigiissitani assigisaannilu ilaasortat Inatsisartunut ilaasortaannigisut Inatsisartunut ilaasortat aningaasarsiaannut naapertuuttumik aningaasarsiaqartinneqarnissaat. Tamatumani pineqarput immikkut ilisimasallit assigisaallu. Ullumikkut inatsisitigut tunngavissaqareerpoq siulittaasuuffinni immikkut suliassa qarfiusuni siulittaasunut immikkut tapisiamik Naalakkersuisut aalajangersaasinnaanissaannut. Taamatut tunngavissaqarnerup ataatsimiititaliani taamaattuni nalinginnaasumik ilaasortanut aamma atuuttussanngortinneqarnissaa siunnersuutigineqarpoq.

### **3. Pisortanut aningaasatigut allaffissornikkullu kingunerisassat**

Inatsisissatut siunnersuutip Nunatta Karsianut aningaasartuutit eqqarsaatigalugit sunniuteqannginnissaa naatsorsuutigineqarpoq, aningaasartuutaanerusussat annikeqisut ineqarnermut akiliuteqartarnerup qaffanneqarneratigut matussuserneqartussaammata.

### **4. Inuussutissarsiornermut il.il. aningaasatigut allaffissornikkullu kingunerisassat**

Inatsisissatut siunnersuut inuussutissarsiornermut kinguneqassanngilaq.

### **5. Avatangiisinut pinngortitamullu kingunerisassat**

Inatsisissatut siunnersuut taakkununnga kinguneqassanngilaq.

### **6. Innuttaasunut allaffissornikkut kingunerisassat**

Inatsisissatut siunnersuut innuttaasunut allaffissornikkut kinguneqassanngilaq.

### **7. Naalagaaffeqatigiinnermut namminersornermullu pissutsit**

Inatsisissatut siunnersuut taakkununnga kinguneqassanngilaq.

### **8. Oqartussat suliniaqatigiiffiillu il.il. tusarniarneqarnerat**

Inatsisissatut siunnersuut Naalakkersuisut Siulittaasuata Naalakkersuisoqarfiata Inatsisartullu Allattoqarfiata akornanni suleqatigiilluni suliarineqarpoq malittarisassanullu Inatsisartunut aamma Naalakkersuisunut ilaasortat akornanni atuuttunut tunngalluni. Siunnersuut taamaattumik tusarniaatigineqarsimanngilaq.

## Siunnersuummi aalajangersakkanut ataasiakkaanut nassuiaatit

### § 1-imut

#### Nr. 1-imut

Akissaateqarfimmi akissarsianut nalinginnaasumik tapisiap akissaateqarfimmi akissarsianut ilanngunneqarsimanerata malitsigisaanik aalajangersakkap aaqqissuussaannikkut allanngortinneqarnissaa siunnersuutigineqarpoq, kiisalu isumaqatigiissut innersuussutigineqartoq erseqqissarneqarluni. Allannguutit aningaasarsiat annertussusiannut sunniuteqassanngillat.

#### Nr. 2-mut

Malittarisassat tjenestemandinut atuuttut malillugit ataatsimiinneq tamaat tamakkiisumik ullormusiaqartitsisarnermik periusiusup atuuttup attatiinnarneqarsinnaaneranut inatsisitigut naammattumik tunngavissaqarnerseqqimallugu imaluunniit tamatumunnga taarsiullugu angerlarsimaffik qimallugu piffissami sivilunerusumi sulinermut malittarisassat malillugit ullormusiaqartitsisoqartassanersooq nalornissutigineqarsimavoq.

Angerlarsimaffik qimallugu piffissami sivilunerusumik sulinermut atatillugu ullormusiaqartitsisarnermut malittarisassat malinneqassappata tamatuma malitsigisussaavaa ullormusiat ullut 28-it qaangiuppata pingajorarterutaannik ataatsimik ikilisinneqartarnissaat, imaluunniit nammineq iganissamat naapertuuttumik periarfissaqarput ullut 15-it qaangiuppata.

Atuuffimmut atorfeqarnermut tunnganngitsumut qinikkatulli suliassaqartitaanermut tunngasumut angerlarsimaffik qimallugu piffissami sivilunerusumi sulinermut atatillugu malittarisassat atorneqarnissaat piviusorsioortuunngimmat massakkut periaasiusup atuuttup inatsisitigut tunngavissinneqarnissaa pissusissamisoornerpaatut isigineqarpoq siunissami qanoq paasinninnissamik nalornissutaasinnaasut peerniarlugit.

Taamatut inatsisitigut tunngaviliinerup pissusissamisoortumik ilaatut taamaalilluni aamma angerlarsimaffik qimallugu piffissami sivilunerusumi sulinermut ikilisitamik ullormusiaqartitsinerup tamakkiisumik ullormusiaqartitsinerullu akornanni nikingassut akileraarutaasussaassanngilaq. Tamatuma naatsorsuutigineqarpoq qaqugukkulluunniit Kalaallit Nunaanni tjenestemandinut atuuttunit annertunerusumik aningaasartuutitut matusissutissanik tunniussisoqartassanngitsooq.

#### Nr. 3-mut

Akissaateqarfimmi akissarsianut nalinginnaasumik tapisiap akissaateqarfimmi akissarsianut ilanngunneqarsimanerata malitsigisaanik aalajangersakkap aaqqissuussaannikkut allanngortinneqarnissaa siunnersuutigineqarpoq, kiisalu isumaqatigiissut

innersuussutigineqartoq erseqqissarneqarluni. Allanguutit aningaasarsiat annertussusiannut sunniuteqassanngillat.

Nr. 4-mut

Inatsisartut siulittaasuat aamma Naalakkersuisut siulittaasuat taamatut atuuffeqarnermut atatillugu sinniisutut pisussaaffitik malillugit maannamut akeqanngitsumik ineqartinneqarsimapput. Akeqanngitsumik ineqartinneqarneq ukiut tamaasa akileraartarneq eqqarsaatigalugu nalilerneqarneqartarsimavoq siulittaasut isertitaasa akileraaruteqaataasussat qaavannut ilineqartartoq.

Tamatumani malittarisassat erseqqissarneqarnissaat siunertaralugu nutaatut siunnersuutigineqarpoq siulittaasut siunissami ineqarnermut akiliutaat 48.000 kr.-inik naleqartillugu akileraartinneqartalernissaat. Kisitsit naatsorsorneqarpoq 2001 taamanikkut siulittaasumut inigitinneqartumut akileraartarnermut oqartussat naliliinerannik tunngaveqarpoq, kisitsillu 1. januar 2002-mi aallartittumik ukiumoortumik akinit naleqqersuummik Naatsorsueqqissaartarfimmit suliarineqartartumik iluarsineqarsimalluni.

Inissiat aamma sinniisutut pisussaaffiit eqqarsaatigalugit nalinginnaasumit anginerummata, taamatullu aamma innaallagissamik atuineq, kiassarneqarneq ingerlatsinermullu atuinerit allat ilaatigut taakkuninnga najugaqartup nammineq sunniuteqarfigisinnaanngisai matuminnga sunnerneqarsimammata, taakkuli atuuffiinut atallutik inissiat siunertaannut naapertuuttutut isigineqarpoq inissianut atatillugu ingerlatsinermut aningaasartuutit Namminersorlutik Oqartussat akilertarpatigik. Innaallagissap kiassarneqarnerullu saniatigut ingerlatsinermut aningaasartuutit paasineqassapput imermut, eqqiaanermut, oqarasuaammut, internettimut, anartarfeqarnermut, aputaajaanermut, isumannaallisaanermut aamma tillinniartoqarsinnaaneranut kalerrisaaruteqarnermut, kiisalu illup iluata silataatalu aserfallatsaalineqarneranut aningaasartuutit.

Nr. 5-mut

Naalakkersuisunut ilaasortat atorffimminnut atatillugu ineqartinneqarput, Namminersorlutik Oqartussat sulinermut atatillugu inissiaataanni najugaqarfiusussaataitaasuni ineqarnermut akileeqataassutip naatsorsorneqarnissaanut malittarisassat qaqugumulluunniit atuuttut malillugit maannamut ineqarnermut akiliuteqarfiusarsimasumik. Malittarisassat pineqartut Kalaallit Nunaanni sulinermut atatillugu inissiat pillugit isumaqatigiisummi 14. december 1988-imeersumi (Nalunaarutit C I, 5-1-9) aalajangersarneqarsimapput. Isumaqatigiisummi § 2 naapertorlugu ineqarnermut akileeqataassuteqartitsisoqartarpoq malittarisassat sukumiinerusut isumaqatigiisummi §§ 3-10 aalajangersarneqartut malillugit. Isumaqatigiisummi § 12 malillugu ukiumut ataasiarluni ineqarnermut akileeqataassutip iluarsineqarnissaa tjestemandit kattuffiinut isumaqatigiinniutaasartussaagalarpoq. Pissusiviusulli imaapput taamaaliortoqartarsimanani, ilaatigullu tamatuma malitsigisaanik

atorfimmut atatillugu inissianut ineqarnermut akileeqataassut allanut sanilliullugu annikilluni. Naalackersuisut naatsorsuutigaat ineqarnermut akileeqataassutaasartut iluarsineqarnissaannik tjenestemandit kattuffiit siunnersuummik saqqummiussaqaarnissartik, kisitsisitigut paasissutissat pisariaqartut INI A/S-imit pissarsiarineqarsimaleriarpata.

Atorfimmut atatillugu inissianut Naalackersuisunut atugassanngortinneqarsimasunut ineqarnermut akileeqataassut inissiaq sulisorisatut inissiatut ineqarnermut akiliuteqarfiussatut innersuunneqarsimasuuppat ineqarnermut akiliutitut aalajangersarneqartussap 20-30 %-iata missigaa.

Ineqarnermut akileeqataassutip aamma ineqarnermut akiliuteqartarneq pillugu malittarisassat malillugit ineqarnermut akiliutip taama assigiinngitsiginerat pissusissamisuunngilaq. Taamatuttaaq aamma pissusissamisuussanngilaq atorfimmut atatillugu inigisanut ineqarnermut akileeqataassutip iluarsineqarnissaanut isumaqatigiinniarnertit utaqqineqassappata. Taamaattumik siunnersuutigineqarpoq Naalackersuisunut ilaasortat ineqarnerminnut akiliuteqartassat inissiani Namminersorlutik Oqartussani sulisorisanut inissiatut innersuunneqartuni ineqarnermut akiliutip naatsorsorneqartarnerinut malittarisassat qaqugukkulluunniit atuuttut, tassa inissianik attartorneq pillugu inatsisartut peqqussutaat nr. 2, 12. maj 2005-imeersoq, kingusinnerusukkat allannguutai ilanngullugit, malillugu ineqarnermut akiliutip naatsorsorneqarnissaanut nalinginnaasumik malittarisassat, malillugit inissiamut pineqartumut ineqarnermut akiliutissap naatsorsorneqartup 60 %-ianik akilersorneqartussamik.

Nalinginnaasumik ineqarnermut akiliuteqartalernissamat ikaarsaariarnissaq naapertuuttutut isigineqanngilaq, tassami Naalackersuisunut ilaasortat inigisamat allamat imaluunniit meeqqanut ilinniarnertik pissutigalugu Nuummut nuussinnaanngitsunut inissiamut aningaasartuuteqarsinnaasarmata, taamatullu aamma piareersimasariaqarlutik inigisamik sivikitsuinnarmik periarfissaqartitsilluni qimattariaqarnissaanut.

Nr. 6-imut

Akilerartarnermut inatsisini malittarisassat malillugit inissiaq inissianik attartorneq pillugu inatsisartut peqqussutaat nr. 2, 12. maj 2005-imeersoq, kingusinnerusukkat allanngortinneqartartoq, naapertorlugu inigisamat akiliutip naatsorsorneqartarneranut nalinginnaasumik malittarisassat malillugit naatsorsorneqartumit annikinnerusumik ineqarnermut akiliuteqartartarpat tamanna akilerartarnikkut ajunngitsorsiaavoq akilerartuuteqataasusaaq.

Naalackersuisunullu ilaasortarpassuit sinniisutut pisussaaffeqarlutillu marloqiusamik ineqarnermut akiliuteqartarput. Tamatumunngalu atatillugu eqqarsaatigigaanni taakku tamarmik ilaasortanut annertunerusumik aningaasatigut pisussaaffiliisut, eqqornerpaatut isigineqarpoq ineqarnermut akiliutip naatsorsorneqarnissaanut malittarisassat nalinginnaasut

malillugit ineqarnermut akiliutissap naatsorsorneqartup aamma nr. 5-imi malittarisassat malillugit akiliutaasartussat siunnersuutigineqartup assigiinngissutaat akileraaruteqaataasussaatinngikkaanni.

Tamanna qularnaarneqassappat akileraartarnermut inatsisini malittarisassat sanioqqunneqarnissaannut inatsisitigut tunngavissaqarnissaq pisariaqarpoq.

Nr. 7-imut

Inissiamut inissiamiillu nuunnermut atatillugu aningaasartuutit maannamut Namminersorlutik Oqartussanit akilerneqartarsimapput aningaasarsiaqartitsineq pillugu inatsimmut 18. december 2003-meersumut siunnersuummut nassuiaatit naapertorlugit (UKA 2003/123). Maanna siunnersuutigineqarpoq tamanna inatsisip oqaasertaani allassimalissasoq, § 1, imm. 4, oqaaseqatigiit pingajuanni Inatsisartunut ilaasortat eqqarsaatigalugit taamaaqataanik aalajangersagaq naapertorlugu. Naalakkersuisunut ilaasortat Nuummi najugarsimannigitsut pigisaasa nuunnerinut aningaasartuutit saniatigut aamma matussuserneqartassapput pigisat poortoriartorlugit najugaqarfisamut bilitsi, aapparisaq, nalunaarsorsimasumik inooqatigisap aapparisaalluunniip ukioq ataaseq sinnerlugu ataatsimut inuit nalunaarsorsimaffiat naapertorlugu najugaqatigisimasap kiisalu meeqqat 18-it inorlugit ukiullit angerlarsimaffimmi najugaqartut bilitsii. § 19-ip (nr. 13) allanngortinneqarnissaannut siunnersuut naapertorlugu Inatsisartut siulittaasoqarfiat isumaqatiginiareerlugu Naalakkersuisut tamanna pillugu malittarisassanik sukumiinerusunik aalajangersaasinnaapput.

Nr. 8-mut

§ 6, imm. 10-mut siunnersuutikkut siunnersuutigineqarpoq napparsimaneq pissutigalugu peqannginnermi aningaasarsiaqartitsisoqartassasoq, soorlu aamma pissutissaqavilluni peqannginnerit ilaasortaajunnaarnersiutissat naatsorsorneqarneranni ilaatinneqartassasut.

Inatsisartut Naalakkersuisullu pillugit Inatsisartut inatsisissaattut siunnersuummi § 24 naapertorlugu Naalakkersuisut siulittaasuata akuerisinnaavaa Naalakkersuisunut ilaasortat Naalakkersuisunut ilaasortaannerminniit sulinngiffeqarsinnaanerit.

§ 6, imm. 10 naapertorlugu qanigisanik toqusoqartillugu napparsimaruluttoqartilluguluunniit peqannginneq napparsimanertulli pissutissaqavissumik peqataannginnertut isigineqassaaq, taamalu aamma aningaasarsiaqarfiusassalluni. Imm. 10-mi qanigisatut qanigisat napparsimarulunnerinut aamma/imaluunniit toqunerinut ilisaaneranullu atatillugu akiliunneqarluni angalaneq sulinngiffeqarnerlu pillugit isumaqatigiissut 27. maj 1993-imeersoq (Nalunaarutit C I, 4-1-37) naapertorlugu paasineqassapput angajoqqaat, nularisaq uigisarluunniit taakkunungalugu sanilliunneqarsinnaasut, meeqqat qatanngutillu, kisiannili pineqaratik nularisaq uigisalluunniip taakkunungaluguunniit sanilliunneqarsinnaasup ilaqtai.

Kiisalu § 6, imm. 11-mi siunnersuutigineqarpoq naartuneq, ernineq meeravissiartaarnerlu pissutigalugit peqataannginneq pissutissaqavilluni peqataannginnertut isigineqassasoq, taamalu aningaasarsiffiulluni, maannamut § 2. imm. 5-iusoq naapertorlugu Inatsisartunut ilaasortanut atuuttoq assigalugu. Naartunermi, erninermi meeravissiartaarnermilu sulinngiffeqartarnerq il.il. ullormusiaqartarnerlu pillugit Inatsisartut peqqussutaat nr. 12, 23. december 1996-imeersoq, kingusinnerusukkut allannguutai ilanngullugit najoqqutassiisutut isigineqarsinnaavoq. Taamatut aningaasarsiaqartitaaneq aamma ilaasortaajunnaarsiutitut naatsorsorneqarnerannut ilaassaaq.

§ 6, imm. 10-11-mut siunnersuutit § 2, imm. 4-5 malillugu aalajangersakkanut Inatsisartunut ilaasortanut atuuttunut naapertuupput.

Nr. 9-mut

Maannamut nerisaqarnerq ineqarnerlu akiligassiineq malillugu matussuserneqartarsimapput. Taamaattorli siunnersuutigineqarpoq tamatumunnga taarsiullugu sulinerlut atillugu aningaasartuutaanerusunut ajunngitsorsiaqartitsisoqarsinnaassasoq, tassa ullormusiaqartitsisoqarsinnaassasoq Kalaallit Nunaanni Danmarkimilu sulinerlut atillugu angalanerni aningaasartuutaanerusut matussuserneqartarnerat pillugu isumaqatigiissut 12. marts 1986-imeersoq (Nalunaarutit C I, 4-1-24) malillugu. Tamatumunnga tunngaviuvoq tamanna pineqartumut allaffeqarfinnullu pisariinnerussammat ullormusiaqartitsisarnermut malittarisassat malillugit matussusiisarneq aquneqarpat akiligassiisarluni matussusiisarnermut taarsiullugu. Malittarisassat atuuttut naapertorlugit ullormusiaqartitsisoqassappat piumasaqaataavoq tamatumani aningaasartuutaanerusut pineqarnissaat. Assersuutigalugu pineqartoq pisortatigoortumik nereqatigiinnermi peqataappat tamanna ullormusiassani ilanngaatigineqartussaavoq. Ullormusiaqartinneqartarnissaq toqqarniaraanni tamanna ukiukkaartumik pisassaaq, pineqartoq allaffeqarfiillu siumut erseqqissunik malitassaqarniassammata.

Nr. 10-mut

Kapitali 3 (§ 9) Inatsisartut siulittaasuata, Naalakkersuisut siulittaasuata Naalakkersuisunullu ilaasortat qinigaaffimmik saniatigut allanik suliassaqartitaasinnaaneranmut tunngavoq. Inatsisartuni Naalakkersuisuniluunniit qinigaaffinnut ivertinneqarnerni suliassaqartitaaffiit allat qimanneqartartussaapput Qinigaanerup misilinneqarnissaanut ataatsimiititaliaq taakku attatiinnarnissaannut akuersissuteqarsimangippat. Aalajangersakkap aningaasarsiaqartitaaneq pillugu inatsimmit peerneqarnissaa siunnersuutigineqarpoq, qinikkat pineqartut aningaasarsiaqartinneqarnerannut allatulluunniit ajunngitsorsiaqartinneqarnerannut tunnganngimmat, pineqartulli aalajangiiniarnerni assigiinngitsuni peqataasinnaanerisa pissutsillu assigisaasa nalilerneqartarnissannut tunngammat. Aalajangersakkap Inatsisartut Naalakkersuisullu pillugit Inatsisartut inatsisaanniinnissaa eqqornerusutut isigineqarpoq. Taanna qanittukkut nutarterneqartussaavoq. Naalakkersuisut taamaalillutik ukiakkut ataatsimiinnermut ingerlasumut (UKA2010) Inatsisartut Naalakkersuisullu pillugit inatsisartut



inatsisissaattut siunnersuummik saqqummiussa qarput. Inatsisissatut siunnersuut pineqarteq allanik atuuffeqarsinnaaneq pillugu aalajangersakkamik ima qarpoq aalajangersakkamat matumani peerneqartussatut siunnersuutigineqartumut imarisaatigut allangortinnagu naapertuuttumut. Taamaalilluni siunertaavoq aalajangersakkap aningaasaqarsiaqartitaaneq pillugu inatsimmiit Inatsisartut Naalakkersuisullu pillugit Inatsisartut inatsisaannut nutaamut nuunneqarnissaa.

Nr. 11-mut

§ 10, imm. 10-mut siunnersuutip malitsigissavaa Naalakkersuisut siulittaasuata Naalakkersuisunullu ilaasortat ilaasortaajunnaarnersiutisiassaasa taamaallaat maannamut § 6, imm. 1-3-usimasut naapertorlugit Naalakkersuisut siulittaasuattut Naalakkersuisunulluunniit ilaasortatut aningaasarsiat aallaavigalugit naatsorsorneqartarnissaat. Taamaalilluni maannamut § 1, imm. 1-usimasoq naapertorlugu Inatsisartunut ilaasortatut aningaasarsiat ilaasortaajunnaarnersiutissat naatsorsorneqarneranni tunngavissanut ilaatinneqartassanngillat. Taamaaliornikkut Inatsisartunut ilaasortatut aningaasarsiaqaatigaluni aningaasarsiat taakkorpiat tunngavigalugit naatsorsorneqartunik ilaasortaajunnaarsiuteqartitsinikkut marloqiusamik aningaasarsiaqartitsisoqarsinnaajunnaassaaq. Maannamut § 10, imm. 9-usimasoq naapertorlugu tamanna aamma Inatsisartut Siulittaasuannut atuutissaaq. Naalakkersuisunut ilaasortat Inatsisartunut ilaasortaannngitsut eqqarsaatigalugit § 6, imm. 2 maannamut atuuttoq naapertorlugu tapisiaq taamaattoq ilaasortaajunnaarnersiutit naatsorsorneqarnissaannut tunngavissanut sulii ilaassaaq.

Nr. 12-mut

Inatsisartunut ilaasortaannngitsunut ataatsimiititaliani, aalajangiisartuni, sinniisoqarfinni il.il. immikkut oqimaatsunik suliassa qarfiusuni siulittaasuutinneqartunut tapisiaqartitsisinnaanermut Naalakkersuisut maannamut periarfissaat – tassa § 18, imm. 1 oqaaseqatigiit siulliit malillugit naatsorsuinermut annerusumik aningaasarsiaqartitsinissamik aalajangersaanissamut – siunnersuutigine qarpoq aamma ataatsimiititaliani, aalajangiisartuni, sinniisoqarfinnilu il.il. ilaasortanut allanut aamma atuuttussanngortinneqassasoq. Tamatumunnga tunngaviusoq isumalioqatigiissitani sulinerni annertunerusuni assersuutigalugu Akileraartarnermut Atugarissaarnermullu Isumalioqatigiissitami imaluunniit Kalaallit Nunaata Aningaasaqarniarneq pillugu Siunnersuisartoqatigiivini pisariaqarmat avataanit immikkut ilisimasallit taakku immikkut piginnaasa qarfii tunngavigalugit ajunngitsorsiassaqartinneqarnissaat. Taamatut annertusiinerup taamaallaat qaqutigunnaq atorneqartarnissaa naatsorsuutigine qarpoq. Imm. 1, oqaaseqatigiit siulliit naapertorlugit angerlarsimaffigisap avataani ataatsimiinnernut peqataanerni angalaneq najuga qarnerlu akilernerqartuartassapput ullormusiaqartitsisoqarlunilu. Aningaasarsiasap qaammatikkaartumik tunniunneqartarnissaanik maannamut imm. 2, oqaaseqatigiinni kingullerni aalajangersakkap atorunnaarsinneqarnissaa siunnersuutigine qarpoq, taamaalilluni qaqugukkut tunniunneqartarnissaat pineqartumik isumatigiissuteqarnikkut pisinnaalissalluni, aningaasarsisitsinerlu kingumut akiliuteqarnikkut pisinnaalerluni.

Nr. 13-imut

§ 19-imi maannamut atuuttumi Inatsisartut siulittaasoqarfiat piginnaatinneqarpoq Naalakkersuisut isumaqatiginiareerlugit Inatsisartut inatsisaat malillugu malittarisassanik sukumiinerusunik aalajangersaasinnaaneranut. Eqqornerusutulli isigineqarpoq Inatsisartut siulittaasoqarfiat Inatsisartunut ilaasortat eqqarsaatigalugit malittarisassanik sukumiinerusunik aalajangersaappat, Naalakkersuisullu Naalakkersuisunut ilaasortat eqqarsaatigalugit malittarisassanik sukumiinerusunik aalajangersaallutik. Naalakkersuisut eqqarsaatigalugit malittarisassat sukumiinerusut assersuutigalugu § 6 (allannguutitut inatsimmi matumani nr. 7) naapertorlugu aningaasartuutit matussuserneqartarnerannut imaluunniit ilassinninnernut aningaasartuutitut, angalanernut aningaasartuutitut aningaasartuutinullu allanut il.il. aningaasaliissutinik naalakkersuisut atuinerat pillugu kaajallaasitaq 14. december 2005-imeersoq naapertorlugu ilassinninnermut aningaasartuutit matussuserneqartarnerannut tunngasinnaapput.

Nr. 14 – 30-mut

Taakkunani tamani inatsisip danskisuuani taaguutinik iluarsineq pineqarpoq Oqaasileriffik aamma Dansk Sprognævn isumasioreerlugit taaguutit nutaat pillugit Inatsisartut Siulittaasoqarfiannit Naalakkersuisuniillu najoqqutassiat naapertorlugit. Sumiiffinni ataasiakkaani najoqqutassiat tamakkiisumik malinnissaat ajornarsimavoq: Taamaalilluni assersuutigalugu landstingsmedlemmer maanna medlemmer af Inatsisartut-nut allanngortinneqarsimasoq. Taamaattorli ippinnarmat ”ikke-landstingsmedlemmer” ”ikke-medlemmer af Inatsisartut”-nik taagussallugit, taaguut ”ikke-Inatsisartutmedlemmer” atorneqarpoq, tak. nr. 30. Tamanna aamma assersuutigalugu piginnittorsiutit eqqarsaatigalugit atuuppoq, tak. nr. 25.

#### *§ 2-mut*

Inatsisartut inatsisaata 1. januar 2011 atuutilernissaa siunnersuutigineqarpoq, ilaatigut taamaaliornikkut nr. 2-mi (ineqarnermut akiliutit) aamma nr. 5-imi (ullormusiat) allannguutit allaffissornikkut malitseqartinneqarnissaat piareersarluarneqarsinnaaniassammat.